



**Komunikadu Imprensa**  
**06 Juñu 2022**  
**Parlamentu Nasionál**

## **JSMP husu ba Parlamentu Nasionál, Governu no Instituisuan Relevante sira atu konsidera rekomendasaun Komisaun Anti-Korrupsaun (KAK)**

Komisaun Anti Korrupsaun (KAK) iha Segunda-feira, loron 30 Maiu 2021, iha Parlamentu Nasionál, liuhusi reuniaun plenária halo apresentasaun ba nia relatóriu anuál 2021 ba Parlamentu Nasionál nu'udar obrigasaun legál hanesan Instituisaun Estadu ne'ebé lei fó dalan atu presta nia rezultadu serbisu ba iha Parlamentu Nasionál iha kada tinan.

Relatóriu ida ne'e, hato'o ba Parlamentu Nasionál liga ho saida mak KAK halo atu kontinua mantein prezensa Estadu iha luta kontra korrupsaun iha Timor-Leste. Relatóriu ne'e fahe ba parte 4 mak hanesan iha parte dahuluk introdusaun kona-ba aliñamentu planu no programa estratéjiku KAK nian 2021-2025, parte daruak ninian relata kobertura sira kona-ba implementasaun programa asesu ba justisa liuhusi medida sira kona-ba Prevene Krime Korrupsaun, parte datoluk nian hato'o progresu no rezultadu atividade 12 ne'ebé dezeña atu atinje meta sira ba objetivu nasional husi programa Boa Governasaun no Jestaun Institusionál no parte ikus liu mak dezafiu no rekomendasaun sira.

"JSMP hanoin rekomendasaun sira KAK nian importante no pertinenti tebes ba Parlamentu Nasionál, Governu no instituisaun relevante sira atu konsidera hodi bele haforsa liutan serbisu KAK iha prevene no kombate korrupsaun iha Timor-Leste liuliu atu haforsa KAK liuhusi instrumentu legál sira balun ne'ebé seidakomplementa no apoiu orsamentu ne'ebé suficiente ba KAK hanesan mensiona iha nia relatóriu ne'e", dehan Diretora Ezekutiva JSMP, Ana Paula Marçal.

Rekomendasuan KAK nian ba iha Instituisaun Estadu sira inklui Parlamentu Nasionál no Governu atu konsidera mak hanesan:

- Lei Protesaun Testemuña aprova ona dekade ida liu ba, maibé to'o agora lei refere seidakomplementa ho efetivu. KAK halo tiha ona rekomendasaun iha tinan sira liu ba kotuk ba autoridade sira kompetente atu implementa lei refere, tanba servisu sira investigasaun nian hasoru dezafiu balun liga ho protesaun testemuña no denunciante sira;
- Kria Rejime iha Rekoperasaun Ativu (*asset recovery*) Iha serbisu sira investigasaun kriminal, liuliu iha krime korrupsaun. Autoridade judisiáriu sira, inklui orgaun polisia kriminal, liuliu iha KAK hasoru mós difikuldade oinsa atu deteta no atu lori fila riku-soin Timor-Leste nian ne'ebé mak korruptor sira subar iha rai lí'ur ka lori halai ba rai lí'ur;
- Kria Rejime Jestaun Aprensaun ba Objetu sira atu labele difikulta orgaun Polisia Kriminal sira bainhira halo jestaun ba apremsaun objetu sira;

- Hamosu Lei Rejime Jerál aplikasaun Koima. Implementasaun Lei MPCC relasiona ho Deklarasaun Rendimentu Bens Interese nesesita komplementariu lei sira seluk, hanesan Rejime Jerál Aplikasaun Koima nian;
- Husu atu halo alterasaun ba Kódigu Prosesu Penál atu loke espasu ba iha prosesu averiguasaun nu'udar dever iha KAK atu hafasil prosesu averiguasaun iha rigór antes informa ba MP hodi instora prosesu krime kontra pessoal koletivu sira;
- Aplika estandarizasaun ka matadalan ba Sistema Kontabilidade iha Kode Konduta iha Setór Privadu sira nune'e bele Asegura Padraun no bele fasilita investigadór sira atu hetan informasaun ne'ebé edekuada iha prosesu investigasaun sira ba setór privadu;
- Polítika Inkluzau Finanséira. Implementasaun ba polítika inkluzau finanseira seidak másimu. Sidadaun barak seidak utiliza sistema bankária hodi halo pagamentu, nune'e defísil atu detekta pagamentu ilejítimu sira tanba halo ho modu numeráriu (*cash*) tanba ne'e husu ba Banku Sentral atu intensifika nia sosializasaun kona-ba asuntu ne'e;
- Husu ba Ministériu Justisa, liuliu Komisaun Kadastral atu estabelese baze de dadus relasiona ho *Bens Imoveis* ba sidadaun hotu atu labele difikulta investigadór sira bainhira buka informasaun sira relasiona ho sidadaun sira rejistrasaun ba dadus sira hanesan rai, uma, plantasaun, animál domestíka boot, karreta no motorizada sira iha teritóriu laran tomak;
- Husu ba iha instituisaun ida-idak atu kontinua haforsa sistema internál nian, inklui haforsa direasaun/departamentu sira ne'ebé halo knaar nu'udar auditoria, inspetór no funsaun sira ho natureza hanesan, atu nune'e bele halo funsaun hodi limita rísku sira korrupsaun nian;
- Menus partisipasaun iha prosesu sira halo Desizaun Públiku nian tanba ne'e nesesáriu tebes atu define polítika ne'ebé envolve partisipasaun husi parte sira nakait, liuliu desizaun sira ne'ebé atu responde ba iha interese ema barak nian. Esénsia ida husi Boa Governasaun mak partisipasaun iha formulasaun polítika sira ba ema barak nia di'ak;
- Esforsu koletivu ba Prevene no Kombate Korrupsaun sei fraku iha Timor-Leste. Ho nune'e husu ba parte competente sira iha nível polítika nian, halo desizaun hodi aloka rekursu sira sufisiente ba instituisaun sira iha luta naruk ida ne'e, no iha nível implementasaun nesesidade atu dezenvolve medida sira sistemátiku, integradu no koordinadu, nune'e hodi hakloot espasu sira ba movimentu korruptor sira.

Relatóriu ne'e apresenta husi Komisáriu KAK, Dr. Segio de Jesus Hornai no akompaña husi Adjuntu Komisáriu na'in tolu no estrutura KAK no hetan apresiasaun husi Parlamentu Nasionál.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Email: [ana@jsmp.tl](mailto:ana@jsmp.tl)

Website: [www.jsmp.tl](http://www.jsmp.tl)

Rua Beco Lakateu, Aldeia Manufuik,  
SukuColmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl